

HADIS JUSIĆ

**delegat u Domu naroda
Parlamenta Federacije Bosne i Hercegovine**

Sarajevo, 7.3.2022.godine

**PARLAMENT FEDERACIJE
BOSNE I HERCEGOVINE**

**DOM NARODA
n/r gđin Tomislav Martinović, predsjedavajući**

Bosna i Hercegovina
Federacija Bosne i Hercegovine
**PARLAMENT FEDERACIJE
SARAJEVO**

Primljeno: 07-03-2022			
Org. jed.	Broj	Priloga	Vrijednost
02	- 02 -	532	122

B

Na osnovu člana 172., a u vezi sa članom 164. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09 i 24/20) podnosim radi razmatranja i usvajanja **po skraćenom postupku, PRIJEDLOG ZAKONA O DOPUNI ZAKONA O ZDRAVSTVENOJ ZAŠTITI.**

Delegat

Hadis Jusić

Hadis Jusić

PRIJEDLOG ZA DONOŠENJE ZAKONA PO SKRAĆENOM POSTUPKU

Budući da nije u pitanju složen i obiman zakon, predlažem da se ovaj zakon donese po skraćenom postupku.

PRIJEDLOG

**ZAKON
O DOPUNI ZAKONA O ZDRAVSTVENOJ ZAŠTITI****Član 1.**

U Zakonu o zdravstvenoj zaštiti („Službene novine Federacije BiH“, br. 46/10 i 75/13), u članu 66. iza stava 6. dodaje se novi stav 7. koji glasi:

„Izuzetno od stava 6. ovog člana, direktor zdravstvene ustanove može imati završen ekonomski ili drugi fakultet društvenog usmjerenja, najmanje pet godina rukovodnog radnog iskustva te ispunjavati i druge uvjete propisane aktom o osnivanju, odnosno statutom.“.

Dosadašnji st. 7. do 12. postaju st.8. do 13.

Član 2.

Ovaj zakon stupa na snagu osmog dana od dana objavljivanja u „Službenim novinama Federacije BiH“.

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BiH

Mirsad Zaimović

PREDSJEDAVAJUĆI
DOMA NARODA
PARLAMENTA FEDERACIJE BiH

Tomislav Martinović

**OBRAZLOŽENJE
PRIJEDLOGA ZAKONA O DOPUNI ZAKONA O ZDRAVSTVENOJ ZAŠTITI**

I - USTAVNI OSNOV ZA DONOŠENJE ZAKONA

Ustavni osnov za donošenje ovog zakona sadržan je u članu III. 2. b) Ustava Federacije Bosne i Hercegovine prema kojem su federalna vlast i kantoni nadležni za zdravstvo.

II - RAZLOZI ZA DONOŠENJE ZAKONA

Sadašnjim rješenjem u Zakonu o zdravstvenoj zaštiti je propisano da direktor zdravstvene ustanove mora imati medicinski, stomatološki odnosno farmaceutski fakultet, najmanje pet godina radnog iskustva u struci, znanje o zdravstvenom menadžmentu koje dokazuje certifikatom o obavljenoj edukaciji iz zdravstvenog menadžmenta, odnosno završenoj specijalizaciji iz zdravstvenog menadžmenta ili završenom postdiplomskom studiju iz zdravstvenog menadžmenta, te ispunjavati i druge uvjete propisane aktom o osnivanju, odnosno statutom.

Smatram da se treba omogućiti da se za direktora zdravstvenih ustanova mogu postaviti i osobe koje imaju završen ekonomski, pravni ili drugi fakultet društvenog usmjerenja, obzirom da su problemi u zdravstvenim ustanovama uglavnom vezani za poslove finansijske prirode i da ove osobe mogu biti menadžeri ovih ustanova.

III - FINANSIJSKA SREDSTVA

Za provedbu ovog zakona nije potrebno osigurati dodatna finansijska sredstva u Budžetu Federacije Bosne i Hercegovine.

**ODREDBA ZAKONA
O ZDRAVSTVENOJ ZAŠTITI ("SLUŽBENE NOVINE FEDERACIJE BiH", br.
46/10 i 75/13) KOJA SE DOPUNJUJE**

Direktor

Član 66.

Direktor zdravstvene ustanove imenuje se na osnovu javnog oglasa u skladu sa zakonom.

Direktora zdravstvene ustanove imenuje i razrješava upravni odbor.

Direktora zdravstvenih ustanova čiji je osnivač, odnosno suosnivač Federacija imenuje upravni odbor zdravstvene ustanove, uz prethodnu saglasnost federalnog ministra.

Direktora zdravstvene ustanove čiji je osnivač kanton imenuje upravni odbor zdravstvene ustanove, uz prethodnu saglasnost kantonalnog ministra.

Direktora zdravstvene ustanove čiji je osnivač općina imenuje upravni odbor zdravstvene ustanove, uz prethodnu saglasnost općinskog načelnika.

Direktor zdravstvene ustanove mora imati medicinski, stomatološki odnosno farmaceutski fakultet, najmanje pet godina radnog iskustva u struci, znanje o zdravstvenom menadžmentu koje dokazuje certifikatom o obavljenoj edukaciji iz zdravstvenog menadžmenta, odnosno završenoj specijalizaciji iz zdravstvenog menadžmenta ili završenom postdiplomskom studiju iz zdravstvenog menadžmenta, te ispunjavati i druge uvjete propisane aktom o osnivanju, odnosno statutom.

Propisom federalnog ministra bliže će se regulirati uvjeti u pogledu vrste završenog fakulteta zdravstvenog usmjerenja iz stava 6. ovog člana koje moraju ispuniti osobe koje konkurišu za direktora zdravstvene ustanove u zavisnosti od tipa zdravstvene ustanove.

Uvjet o znanju iz zdravstvenog menadžmenta, a koji je predviđen za osobe iz stava 6. ovog člana tražit će se u konkursnoj proceduri tek nakon donošenja podzakonskog akta federalnog ministra iz člana 152. stav 4. ovog zakona, te otpočinjanja edukacije, odnosno specijalizacije o zdravstvenom menadžmentu na teritoriji Federacije u organizaciji Federalnog ministarstva. Za direktora zdravstvene ustanove koja osigurava specijalističko-konsultativnu, bolničku zdravstvenu zaštitu i djelatnost javnog zdravstva imenuje se osoba koja pored uvjeta iz stava 6. ovog člana ima i odgovarajuću specijalizaciju iz djelatnosti zdravstvene ustanove.

U bolničkim zdravstvenim ustanovama koje ispunjavaju uvjete za izvođenje nastave direktor mora imati pomoćnika za nastavu i naučno-istraživački rad.

Mandat direktora traje četiri godine.

Po isteku mandata ista osoba može, na osnovu javnog oglasa, ponovno biti imenovana za direktora u istoj zdravstvenoj ustanovi, ali najviše za još jedan mandatni period.